



30. september 2025

Inatsisartut suleriaasianni § 37 imm. 1 naapertorlugu Naalakkersuisunut apeqquteqaat imaattoq matumuuna saqqummiuppara.

Naalakkersuisunut apeqqutit:

1. Ukiaaneraniit upernarnissaanut Air Icelandip Kulusuk Islandillu akornanni timmisartuussisarnitik assartuussisarnitillu utitsippatigit, Naalakkersuisut timmisartuussisarnerit assartuussisarnerillu unittuuinnginnissaat qulakkeerniarlugu isumaqatigiissuteqarniarpat?
 - a. Naalakkersuisut ukiuunerani takornariaqarneq, naatitanik nillataartunillu pilersorneqarneq, nalinginnaasumillu timmisartuussinerit unittoornissaat pinaveersaartinniarlugu Air Greenlandi aqqutigalugu pineqartut matussusissallugit pilersaaruteqarpat?
2. Oktoberimi ukiumut umiarsuarnik pajuttuineq naggataartussatut pilersaarutaavoq, novemberi decemberilu sulii imaasaraluartoq. Royal Arctic Linemit umiarsuarnik pajuttuinnermut piffissaliussaq sivitsorneqarnissaa Naalakkersuisut piumasarissamaarpat?
 - a. Ukioq maannamut sivitsuinissaq pilersaarutaava, siunissamilu aaqqiisoqarniarpa?
3. Naalakkersuisut inissaaleqineq akiorniarlugu suut suliniutiginiarpat?
 - a. Namminersorlutik Oqartussat inissialiorniarlutik pilersaaruteqarpat?
 - b. Inissialiorniluni sanaartortoqassappat qaqugu sanaartorneq aallartinneqassava?
4. Ilinniartitaanikkut tunngaviusumik ilinniarfimmik imlt. ingerlariaqqiffiusumik ilinniarfinnik arlaannik Naalakkersuisut pilersitsinissaannik pilersaaruteqarpat?
 - a. Pilersaaruteqartoqarsimappat qaqugu aallartittoqassava?

(Inatsisartunut ilaasortaq Lars Poulsen, Siumut)

Tunngavilersuut:

Nunatta Kangiani tunumi inuussutissarsiutit kiisalu killiffik pillugu Naalakkersuisut ineriartortitsinissamut pilersaarutaat paaserusullugit paragraf 37 najoqqutaralugu apeqqutit apuuppakka.



Isumaqarpunga nunatta kangiani paasineqarnissarput pingaaruteqartoq, pisariaqartitsineq aallaavigalugu pingaarnersiunerlu aallaavigalugu minnerpaamik qulaani taaneqartut piffimmi aaqqiivigineqartariaqavissortut.

Namminersortut ineriartortitseqataarusukkaluarlutik suliakkersorneqarneq killimmik pisortanit ingerlanneqarmat inuussutissarsiornikkut aallarnisaanikkullu pisinnaanngilaq qulaani taaneqartut ineriartortissallugit.

Tasiilami nunaqarfiinilu minnerunngitsumik Nuummi akerliussutsimik takutitsisoqarpoq nunatta kangiani ineriartunnginneq peqqutigalugu, isumaginninnikkullu ajornartorsiernerup annertuallaarnera peqqutigalugu. Nilliajuarneq nunatta sinneranit malugineqarpoq iliuuseqartoqarnissaalu kissaatigineqarluni.

Qulaani apeqqutit taaneqartut pingaarnersiunermit minnerpaamik aallartittariaqartut isumaqarpunga.

Apeqqutigineqartut ullut suliffiusut qulit iluanni akeqquneqarput.